

易

內

傳

易內傳卷之十

繫辭下傳

八卦成列象在其中矣因而重之爻在其中矣
相推變在其中矣繫辭焉而命之動在其中矣
剛柔

象在其中非謂三畫之形體謂小成之八卦初列形
體已具而大成之卦象已成其中是相盪已寓於未
盪中也爻在其中亦非謂卦之六爻謂因而重之六
爻初具而爻辭之理已存其中是有辭固寓於無辭
中也剛柔相推所謂剛柔推而生變化也變即化
而裁之之謂命之即鼓天下之動存乎辭也

吉凶悔吝者生乎動者也 剛柔者立本者也變通者
趣時者也 吉凶者貞勝者也 天地之道貞觀者也
日月之道貞明者也天下之動貞夫一者也
吉凶悔吝因乎卦爻之動實由人事之動而判 剛
柔者對待之體而已具變通之用變通者流行之用
而不離剛柔之本人人事之剛柔與卦體之剛柔無二
本也人事之變通與卦變之趣時無二時也 有時
吉勝乎凶有時凶勝乎吉皆理所固然其時勝者其
常理也貞而已矣 天地有常道日月有常明一貞
而已人事貞勝即貞觀之理故曰天下之動貞夫一
一者大極也惟一故能貞天下之動
夫乾確然示人易矣夫坤隤然示人簡矣 爻也者效

此者也。象也者，像此者也。爻象動乎內，吉凶見乎外，功業見乎變。聖人之情，見乎辭。

易者，有心而實無心。簡者，有為而實無為。天地之所以造化，即賦於人為恒性，是天地畀人以一也。不必以卦爻銖銖分配乾坤，而凡爻之辭，無非效易簡之理。凡卦之象，無非像易簡之德。易者，易簡而已。爻象未動而已，動乎內；吉凶未見而已，見乎外。功業未見而已，見乎變。誰為為之？蓋聖人於觀變畫象，而其情已深，然必於辭始見也。非特文周繫辭之情，即伏羲畫卦之情，亦於辭而見之也。

天地之大德曰生聖人之大寶曰位何以守位曰仁何以聚人曰財理財正辭禁民爲非曰義

天地聖人之功用具諸卦爻之中趣時貞勝之理顯諸聖人功業之大不越易簡而已易簡一而已畫卦繫辭變動無方而人事之動與卦爻之動均貞夫一者易簡之體也變通趣時皆本乎此而天地之造所以妙也聖人之繫辭與見諸治功同此吉凶同患之情故及守位正民之事四在其中七者也文法如錢貫索與動內見外皆示人觀玩之法

右第一章

古者包犧氏之王天下也仰則觀象於天俯則觀法於地觀鳥獸之文與地之宜近取諸身遠取諸物於是始

作八卦以通神明之德以類萬物之情

畫卦者包犧也而神農繼其道黃帝堯舜大其功無非八卦之理也神明之德形上之道也萬物之情形下之器也神明者物情之宰物情者神明之著

作結繩而爲網罟以佃以漁蓋取諸離

農務重於佃漁上古粒食未開故網罟以給鮮食

包犧氏沒神農氏作斲木爲耜揉木爲耒耜耨之利以教天下蓋取諸益

動而入利在耜入之本利在耒八政以食爲先重民生也故播百穀興式穀方穀形性無二善也

日中爲市致天下之民聚天下之貨交易而退各得其

所蓋取諸噬嗑

噬嗑之義取明且動市以權量不爽為明又以其有無化遷變通不滯為動也

神農氏沒黃帝堯舜氏作通其變使民不倦神而化之使民宜之易窮則變變則通通則久是以自天祐之吉无不利黃帝堯舜垂衣裳而天下治蓋取諸乾坤

通變者因人情而為之轉移神化者妙通變於無迹使民鼓舞於道中而情不自己性與之宜也陽窮於九必變為陰陰窮於六必變為陽通者即其變而通之也無以通之則其變亦滯而不能久矣黃帝堯舜易樸陋為文明所謂觀天文以察時變觀人文以化

成天下也。垂衣裳者，禮樂興而明名分昭，教化行而風俗茂也。乾坤易之經也。體乾坤以出治，肇自伏羲，至黃帝堯舜而始著者，凡其所爲，皆義農所欲爲，道同而時有至未至也。故曰變通者，趣時者也。

剡木爲舟，剡木爲楫。舟楫之利，以濟不通，致遠以利天下，蓋取諸渙。

風行水上，乘木有功。水行者，所以濟陸行之窮。自舟楫之利興，而南北交通，用水之渙，以濟渙。聖人因物濟物之妙道也。

服牛乘馬，引重致遠，以利天下，蓋取諸隨。舟必占風而行，車履坦而雷動，舟車固相爲利也。隨

乎人情所向亦隨物性所能人與物交說而相動
重門擊柝以待暴客蓋取諸豫

凡事利必有害舟車交便暴客伺之重門擊柝備之
於豫乃可無患後世藉以為利非創制初旨矣
斷木為杵掘地為臼臼杵之利萬民以濟蓋取諸小過
斷耒耜而作臼杵然後精鑿見而穀之性盡猶之學
道必磨礪而後人之性盡聖人之為生民計周矣小
過取其象為下止上動取其義為物小而利於民
弦木為弧剡木為矢弧矢之利以威天下蓋取諸睽
門柝但可防小奸而不足禦大寇故必作弧矢以威
天下不待其用之也未發而早能威之故一發而即

能靖之妙其用於不用所謂神武不殺也

上古穴居而野處後世聖人易之以宮室上棟下宇以待風雨蓋取諸大壯

奠居非旦夕之計不固則重費經營故取大壯

古之葬者厚衣之以薪葬之中野不封不樹喪期無數後世聖人易之以棺槨蓋取諸大過

聖人制葬埋之禮非獨厚於死者也緣人情而教以至性所以教天下之孝也義當過而過也

上古結繩而治後世聖人易之以書契百官以治萬民以察蓋取諸夬

夫下乾上兌乾取健而斷兌取和而不爭書契者所以習天下於斷而杜其爭端也舉制度數端而他端可槩舉取義於數卦者而六十四卦可槩矣

右第二章

是故易者象也象也者像也象者材也爻也者效天下之動者也 是故吉凶生而悔吝著也 象爻皆以象告故曰易者象也聖人立象盡義總欲人即形下之器尋求形上之道非可執象以泥象亦異於老莊之言罔象也象者材也即人之材剛柔動靜其質有殊也爻效天下之動即舉材之用而發見之耳吉凶悔吝見於人事而象爻已示以象故易冒天下之道 聖人作易是即凶_吉同患之情象即材

與動之微示其意而彖爻者即象之顯陳其理也皆教人以修吉悖凶之事

右第三章

陽卦多陰陰卦多陽其故何也陽卦奇陰卦耦其德行何也陽一君而二民君子之道也陰二君而一民小人之道也

陽卦多陰而奇陰卦多陽而耦見雜陽雜陰仍是純陽純陰即六子知二老矣惟二老之純故能統六子之雜全易之理無非尊陽以御陰故陽卦陰卦並以陽為君夫有陽不可無陰陽卦亦有不善陰卦亦有善但陽為主而陰輔則陰陽並全其善矣蓋以專

陽率衆陰大權歸一羣策効命故一君二民為君子之道若陽剛角立相傾權不歸一在下無所適從是二君一民小人之道也一君二民如一統全盛之時二君一民如晉後南北分疆唐後羣雄割據

右第四章

易曰憧憧往來朋從爾思子曰天下何思何慮天下同歸而殊塗一致而百慮天下何思何慮日往則月來月往則日來日月相推而明生焉寒往則暑來暑往則寒來寒暑相推而歲成焉往者屈也來者信也屈信相感而利生焉尺蠖之屈以求伸也龍蛇之蟄以藏身也精義入神以致用也利用安身以崇德也過此以

往未之或知也窮神知化德之盛也

同歸二語即理一分殊之意至道在心隨物而矩存何思何慮者言應天下之理原在天下無庸以已意預也無思慮者靜而不擾因其當然而自通萬物之聲氣多思慮者動而不寧遂於紛煩而已錮一己之性情日月寒暑往來相循造化自然之功用一大極之理運之而已何思慮之有故天地無心而成化尺蠖龍蛇猶之鳶魚飛躍總為無心之道機君子之與時消息變化不窮亦與物類之屈信蟄存同一自然之理耳辨義日精無心而底於神明而即以致用是心之全體而蘊夫用也用得所宜無心而置身

於至安而即以崇德是心之大用以盡其體也。吾
心之體用涵乎造化物情自然之理由是機純趣洽
臻於窮神知化則聖人之盛德也何容思慮哉。何
思何慮者虛受之心體精義利用者切實之學術理
實而後心虛心虛而後事善由此而臻純孰不知其
然而極於神化則渾然與太虛之造化同流矣。
易曰困于石據于蒺藜入於其宮不見其妻凶子曰非
所困而困焉名必辱非所據而據焉身必危既辱且危
死期將至妻其可得見邪。

人惟自處不困之地自得所據之實而後有以自全
困三自失其勢妄欲爭勢以困人困非所困而人因

挫之是愈困也。自失其安。妄欲倚人以安。據非所據。而人且拒之。是愈失據也。故士貴自審所處。

易曰。公用射隼于高墉之上。獲之无不利。子曰。隼者禽也。弓矢者器也。射之者人也。君子藏器於身。待時而動。何不利之有。動而不括。是以出而有獲。語成器而動者也。

去奸失機。反受其害。君子相幾審勢。事會可乘。毅然圖之。故无不利。蓋其藏器於身者。與時偕止。以待動也。成器而動。與時偕行。無凝滯也。君子隨時而已。子曰。小人不恥不仁。不畏不義。不見利不覩不威。不懲小懲而大誡。此小人之福也。易曰。履校滅趾。无咎。此之

謂也。善不積不足以成名，惡不積不足以滅身。小人以小善為无益而弗為也，以小惡為无傷而弗去也。故惡積而不可掩，罪大而不可解。易曰：何校？滅耳。凶。

無所慕而為善，無所畏而不為不善。清夜凜於刑威，道德樂於華袞，此君子之心也。若小人則必戒休董威，嚴制於始，使以小不善見懲，斯不至於大不善，所以塞禍亂之原也。故敷教在寬，而敕法以嚴。小人之初，未即窮凶極惡，止以無益無傷之念積之，遂至罪不可解，故不善餘殃由來者漸。

子曰：危者安其位者也，亡者保其存者也，亂者有其治者也是故。君子安而不忘危，存而不忘亡，治而不忘亂。

於物而能物物。合陽之德。而卦爲剛體。合陰之德。而卦爲柔體。天地之撰。無不體之。神明之德。有以通之。六十四卦。剛柔不同。均此陰陽之變化也。

其稱名也雜而不越。於稽其類。其衰世之意邪。

先天畫象無言。然體撰通德。則約已極博。後天繫辭甚繁。然雜而不越。則繁不踰簡。上古民淳。事簡。聖人可不言而見義。衰世事變。日紛。故爲世道慮。不得不繁。稱雜舉以著事理之詳。不專指文王與紂之事。夫易彰往而察來。而微顯闡幽。開而當名。辨物正言。斷辭則備矣。

彰往者。即已事語人以故。使之有據。察來者。以未然

引人知新使之不泥於事之顯則推極天道而使人
奉天以治人於理之幽則徵驗人事而使人盡人以
合天往來互證幽顯相通無非陰陽之理也名者陰
陽之大分當之而歸於至理物者陰陽之形迹辨之
而歸於至確論易簡之善使知守德言之正也詳吉
凶之故使知應變辭之斷也孰非陰陽之理哉

其稱名也小其取類也大其旨遠其辭文其言曲而中
其事肆而隱因貳以濟民行以明失得之報

稱名小巨不遺細也取類大精不遺粗也指遠辭文
無疆隅而有實際也曲而中旁通而約於情也肆而
隱旁行而執於義也夫其備往來幽顯名物之致而

稱名指事屬辭命旨不憚煩雜者凡以濟民行也惟
民志貳故正以至一之理失得之報理之至一者也
理一故雜而不越易止陰陽之理陰陽明而失得
之報明矣畫卦爲摩盪之法以象喻也繫辭明卦爻
之義以言傳也其言雜而不越其理不外陰陽皆所
以明失得之報而濟民行也

右第六章

易之興也其於中古乎作易者其有憂患乎

易肇伏羲豈待中古始興按此仍前章衰世之意蓋
中古以來世變日紛文周以憂世之念吉凶同患之
情故繫象繫文明易理以覺世教人修身遠咎之道

而其道於九卦尤著。先儒謂文王處難演易，於有憂患語氣未安，豈文不遘囚，遂不演易乎？

是故履德之基也，謙德之柄也，復德之本也，恆德之固也，損德之脩也，益德之裕也，困德之辨也，井德之地也，巽德之制也。

循禮而行，則志定而德日增，故入德以履爲基。不自滿假，則氣靜而德日裕，故據德以謙爲柄。省察之功，謹於一念，必天心自見，而德有其本。存養之密，期於無間，必立不易方，而德有以固。有所損以祛其累，故德由懲忿窒慾而脩有所益，以充其美，故德以見善則遷而裕由是處困能亨。歷艱難而義理愈晰，德之

辨也。且井養不窮，泯得喪而不遷其所，德之地也。德至此，將巽而善入，以之裁判事變，得利用之宜矣。按此節語，語稱德，是言脩德，非為處患難也。且言脩德足該處患，言處患不能盡脩德之事矣。

履和而至，謙尊而光，復小而辨於物，恆雜而不厭，損先難而後易，益長裕而不設，困窮而通，井居其所而遷，巽稱而隱。

履言和者，節而非強也。謙言尊者，卑不可踰也。復言辨者，慎微在審幾也。恆言雜者，守貞非執一也。損者克己之功，不可畏難苟安，始焉黽勉，久而熟習，自易矣。益者集義之事，不可預期助長，優而柔之久，自厭。

而歆之矣。困難通而通，窮通不在境也。井不遷而遷，居遷妙於養也。巽之隱，則外有以稱物宜者，無非內運之神矣。總見德所以成，非一端可竟也。

履以和行，謙以制禮，復以自知，恆以一德，損以遠害，益以興利，困以寡怨，井以辨義，巽以行權。

履而後和，以和行，謙而有制，以制於禮，復見天心，在於自知，恆不易方，乃能一德，損除惡，故以遠害，益長善，故以興利，處困易於憤激，寡怨，故心亨而自平，其情井養，非以泛應，辨義，故展轉不離其宗，常變異用，行而宜之者，權也。巽能稱，故以行權。

右第七章

易之爲書也不可遠爲道也屢遷變動不居周流六虛上下无常剛柔相遇易不可爲典要唯變所適

易示人以典常故不可遠也而爲屢遷而變動不居六虛者六爻虛其位無心以待時也陰陽之周流其間猶星辰之旋轉寒暑晝夜之徃復也其上下无常有尊卑相成之用焉而相成適以相統也其剛柔相易有動靜相濟之用焉而相濟乃以各正也非可執一而據爲典要也惟變所適而已

其出入以度外内使知懼 又明於憂患與故无有師保如臨父母

懼非懼時勢懼度也蔑典要者無忌憚之小人不知

度不知懼也。拘典要而不知變，徇意見而失度，亦不知懼所當懼也。於遠變得其度，乃以知懼善所遠，惟能懼於平日，故能處憂患而不懼。易道所以師保乎人也，故知畏天命者，乃知用易。

初率其辭而揆其方，既有典常，苟非其人，道不虛行。惟揆其方而有典常，故其道不可遠。惟有典常而又不可為典要，故非其人不能盡其道。易之道變而已矣，而至變之用，有其至正者存，故曰不可為典要。又曰有典常，欲人觀變而得其正也，而其人識拘於墟，或見馳於浩渺，不足以言變，并不足與言變中之正也，故曰神而明之存乎其人。

右第八章

易之爲書也原始要終以爲質也六爻相雜唯其時物也其初難知其上易知本末也初辭擬之卒成之終若夫雜物撰德辨是與非則非其中爻不備噫亦要存亡吉凶則居可知矣知者觀其彖辭則思過半矣易終始而已時者終始循環流行之妙統觀彖辭而明一卦始終之義自得與時變通之妙而天下少智者也是以不可無初擬卒成之初上不可無雜撰明辨之中四爻初上雖有難知易知之殊要告人以慎始善終之道也中四雖有柔中剛勝之殊要語人以用剛用柔之道也道亦惟其時而已

二與四同功而異位其善不同二多譽四多懼近也柔之爲道不利遠者其要元咎其用柔中也三與五同功而異位三多凶五多功貴賤之等也其柔危其剛勝耶

二位卑而與君遠易於隔故必隨分共職而後无咎四位尊近君疑於逼故必秉節小心而後免危二四非無取於剛克而柔中其用之本也其與剛應正以成其柔之善也三五非無取於柔克而剛勝其用之本也其與柔應正以成其剛之勝也二四三五言譽咎吉凶而初上無說者蓋初擬卒成則中四爻之吉凶於初見端於上見委也

右第九章

易之爲書也廣大悉備有天道焉有人道焉有地道焉兼三才而兩之故六六者非他也三才之道也

易廣大無不備無非道也道本大極故三才各一大極極言其體才其用也觀其用之變動有等相雜而吉凶以判孰非此三才之道不窮而悉備哉

道有變動故曰爻爻有等故曰物物相雜故曰文文不當故吉凶生焉

爻者交相變也故道有變動曰爻物文吉凶自交變而生惟道爲之樞故交變不窮有等知道之不清相雜知道之不偏皆變動之妙也不當者多凶而兼言

吉者見陰陽消息在人隨時幹旋而不泥於成數也。

右第十章

易之興也其當陰^殷之末世周之盛德邪當文王與紂之事邪是故其辭危危者使平易者使傾其道甚大百物不廢懼以終始其要无咎此之謂易之道也。

文王與紂之事猶言仁主與暴主之時非專美里之事也蓋文王值毒痛之主切吉凶同患之心不得不繫易明道以正人心猶孔子之作春秋以存王法也意以謂全吾一身易覺天下蒼生難其心切故其辭危也危平易傾教人以戒懼也百物不廢而懼以終始見大任非小心不能勝重器非全力不能舉也。

八章言外內使知懼。此章言懼以終始。懼者千古心學之要也。孔子曰：臨事而懼。孟子曰：吾爲此懼。此懼也。中庸之君子異於無忌憚之小人。此懼也。曾子三省。程子主敬。皆此懼也。

右第十一章

夫乾天下之至健也。德行恆易以知險。夫坤天下之至順也。德行恆簡以知阻。

聖人與天地合德。體乾之健而無所游移。故行皆平易。危險之事能先識其幾而處之裕。蓋心無險則可。平險爲易也。體坤之順而無所乖戾。故行俱簡約。困阻之事能靜觀其變而處之周。蓋心無阻則可變阻。

為簡也

能說諸心能研諸侯之慮定天下之吉凶成天下之亹者

易簡所涵融洽而說諸心是未事裕治險阻之本也
易簡所通詳密而研諸慮是臨事盡治險阻之用也
由是無險阻而吉值險阻而凶以說研者定之而皆
亹亹得所趨避矣說心者寂然無思神无方也研慮
者感而遂通易无體也分配乾坤大況
是故變化云為吉事有祥象事知器占事知來
祥即動之微必微符瑞也變化云為已然之理吉祥
未然之事知器者即已事而明吉凶之理知以藏往

也。知來者，即隱兆而察吉凶之變。神以知來也，皆以研且說者知之也。以變化云為，今天道人事亦泥。天地設位，聖人成能，人謀鬼謀，百姓與能。

天地賦人以易簡之理，而不能示人以知險阻。聖人作易而贊天地所未及，於是謀於羣論，謀於卜筮，百姓皆與其能，是其能即聖人之成能也。

八卦以象告，爻象以情言。剛柔雜居而吉凶可見矣。陰陽往復之象，即變化云為之象也。時位當否之情，即知器知來之情也。以象告者，著剛柔之變，以情言者，發剛柔之蘊。其雜居者，各有善不善，而吉凶可見焉。見者，謂觀象玩辭者見之也。

變動以利言吉凶以情遷是故愛惡相攻而吉凶生遠
近相取而悔吝生情偽相感而利害生凡易之情近而
不相得則凶或害之悔且吝

變動是聖人剛柔相推而繫辭命之所以利用出入
也故曰以利言吉凶情遷正明變動之利遷者不執
一定之謂如泰吉卦而有復隍之憂剝凶卦而有碩
果之善是也故有欲得之而愛相攻欲除之而惡相
攻攻攻有得失也則吉凶生有勢隔而遠相取地親
而近相取取均非善也則悔吝生有德相應而情感
利相昵而偽感情則利生偽則害生人事凶悔之變
不勝窮而莫險阻於攻取之責攻蜀莽近下目尋

將叛者其辭慙。中心疑者其辭枝。吉人之辭寡。躁人之辭多。誣善之人其辭游。失其守者其辭屈。

人心之險阻。變不勝窮也。而莫著於辭。辭雖外飾。而知言者能即辭而見其心。聖人欲治人事之險阻。不得不變辯議論之險阻。立象者。正辭之祖。彖爻者。以辭正辭也。吉人而外。躁人將叛。心疑者。猶可反正。至失守。則陷險阻矣。誣善則陷愈深。不可拔矣。嗚乎。言辭之害。中於人心。學術孟子以知言者。距邪放淫。其憂險阻也。豈得已哉。易為世境險阻而作也。非易簡不足以治險阻。聖人明易簡之理。以治世之險阻。說心研慮。易簡之理在心也。知器知來。易簡之理著於

事也。成能而百姓與能。易簡之業被於世也。象告情
言。備險阻之徵應也。攻取感應與辭之紛異。窮險阻
之情狀也。故曰易簡而天下之理得。

右第十二章

易內傳卷之十一

說卦傳

昔者聖人之作易也幽贊於神明而生蓍

而倚數 觀變於陰陽而立卦發揮於剛柔而生爻和
順於道德而理於義盡性以至於命

著者造化神明之所為聖人動與神游靜與神息故
有以贊天地之化育而兆神蓍之靈蓋一氣所動一
理所協聖人之神自合乎造化之神也 天陽數奇
參者奇也參各一奇參其一見陽之有餘地陰數偶
兩者偶也兩止乎兩兩其一見陰之不足蓋天之用
員故取其徑而員者有參之象陽用其全也地之體

方故取其偶而峙者有兩之形陰用其半也 陰陽
剛柔不越參兩而觀變立卦發揮生爻則天地之神
明見於掛扐中矣德義性命不外大極而為和順為
理為窮盡不出心之神明則聖人之幽贊在引伸觸
長中矣可見著數立而人心之神明以動人人可以
用易也 著生於幽贊神明以著由天地之神明生
也參天兩地者因天地之神明以盡著數之神明也
著數立而卦爻生是神明之著於形下者也卦爻生
而德義性命以傳焉所謂形上之道神明存乎其人
者也 要惟聖人之神明合乎天地之神明而後能以
著數之神明盡天地神明之用也

右第一章

昔者聖人之作易也將以順性命之理是以立天之道曰陰與陽立地之道曰柔與剛立人之道曰仁與義兼三才而兩之故易六畫而成卦分陰分陽迭用柔剛故易六位而成章

聖人於性命自然中著為當然之矩故作易以順性命之理非於性命有加也後世之擬易者皆鑿性命之理者也道在天以氣行曰陰陽在地以形處曰柔剛在人受天地之形氣以為理曰仁義要之用同一道也天地人無異性命也道原自立然非聖人參贊之則道僅流行於大化中而不能實著於世此易所

以作也。三才原各有兼兩之用。天主陽而必兼陰以妙其用。地主柔而必兼剛以成其質。仁為萬善長而人之體仁必兼義以盡其道。聖人因其兼兩而兩之豈有加哉。張子曰：一故神，兩故化。非兩則一之理未盡也。分陰分陽，截然不淆，是性命對待之易。迭用柔剛如環無端，是性流行之易。此章言聖人貫通三才，幹旋陰陽，剛柔至有定至無方，而其措諸事業，仁以主義，^義以濟仁，不偏於一，以盡性命之理者，可推矣。

右第二章

天地定位，山澤通氣，雷風相薄，水火不相射，八卦相錯。數往者順，知來者逆，是故易逆數也。

不舉卦名。但言天地六子見天地間原有易也。聖人因其定位而畫乾坤。因其通氣而畫艮兌。因其相薄不相射而畫坎離震巽。其位乾於南坤於北者。南陽盛北陰盛也。艮西北兌東南者。西北氣剛多山東南氣柔多澤也。坎西離東者。東生氣而文明聚西肅殺而陰阻多。木為大母。金為水本也。震東北巽西南者。雷屬木而東北則木之所以生。風亦屬木而榮於南。成於西。非西南燥烈之氣不能入物而助雷陽之用。是先天之對待也。其定位處下濟而上行。其通氣處融與結相資。其相薄處動與入相用。其不相_射處燥潤寒燠相濟。則於此得交錯之義。由是相為六十四

卦是先天已開後天矣。圖彖中起雖有順逆而實生生者皆起於未生。總一逆入之數。逆者言未至而難測也。按大圓圖即卦氣之說。每月五卦。至節而周更續以中孚四卦。維六十卦者。中孚天地之不二。小過艮震為冬春之交。天地之終始。既未濟天一地二。火水之生成。且以未濟終者。見陰陽之不窮也。天地定位四句。對待之定體。而已含流行之用。故承以八卦相錯。交易即寓變易也。曰易逆數。就其相錯言之也。上章曰迭用。此云相錯。可蔽全易矣。

右第二章

雷以動之。風以散之。雨以潤之。日以烜之。艮以止之。兌

以說之乾以君之坤以藏之

動散潤晷止說君藏此天地之撰而神明之德所著
無非易之所以也二老六子有其事聖人畫象以明
其理君者易始六子之化如百職受成於天子藏者
作成六子之化如百物貯藏於府庫二老六子無心
而成化聖人用易亦無為而贊化

右第四章

帝出乎震齊乎巽相見乎離致役乎坤說言乎兌戰乎
乾勞乎坎成言乎艮

出震之帝全體之天宰西北之乾一節之天氣故戰
乾非純乾役坤非純坤夫專體之八卦五行之形質

也流行之八卦五行之氣運也要之無氣不成形無形不能載氣一節之乾坤無非純乾坤非全體不能為逐節也

萬物出乎震震東方也齊乎巽巽東南也齊也者言萬物之潔齊也離也者明也萬物皆相見南方之卦也聖人南面而聽天下嚮明而治蓋取諸此也坤也者地也萬物皆致養焉故曰致役乎坤兌正秋也萬物之所說也故曰說言乎兌戰乎乾乾西北之卦也言陰陽相薄也坎者水也正北方之卦也勞卦也萬物之所歸也故曰勞乎坎艮東北之卦也萬物之所成終而所成始也故曰成言乎艮

物得雷動而蟄啓甲拆以出。然無以散之。則滯積成穢。巽居東南。承東震之生氣。開南離之燥氣。故能䟽滯散穢。入萬物而使之潔齊也。正位南面。作覩萬物。所謂明目達聰。無不照臨也。養萬物者土也。土德貫四時。而氣王於夏秋之交。前收離燥。後蘊金肅。萬物漸於實。養功於是而極。致役者坤。承天時行。爲乾坤非爲物役也。秋肅何以云說。惟萬物皆實之時。則生理酣足而融洽。蓋物夏暄而榮。故離爲萬物相見得。秋氣而堅。故兌爲萬物之說。蓋日與金水之氣交凝。而物乃結實也。陰氣盈而陽未生。不相薄。則無以殺陰氣。而伸陽氣。故乾之戰。所以爲萬物存生氣也。長

夏水潦方盛。至冬則水涸。而以爲水王者。寒爲水氣之王也。沍寒之時。化工主歸藏。內一陽爲天地之心。萬物歸根保和。故爲勞而成功也。造化一氣流行。生生不息。而艮實爲終始相轉之軸。貞下起元。非獨成冬之終。而成四時之終。非獨成春之始。而成四時之始。夫艮何以秉四時之軸。以其兼水土之氣也。其於乾坤。獨國之秉鈞者也。先天著八卦之定體。功以各配而不泛。故不舉卦名。而但言其象。後天著八卦之流行。氣以相生而不窮。故不舉其象。而但言其卦名。蓋先天者專體之八卦。體也。後天者一氣之八卦。用也。文與義。二易也。竊意先天緣河圖。後天緣洛

書圖方書員其理相爲經緯先後天一道也
言造化之氣下節言造化之功
上節

右第五章

神也者妙萬物而爲言者也動萬物者莫疾乎雷撓萬
物者莫疾乎風燥萬物者莫熯乎火說萬物者莫說乎
澤潤萬物者莫潤乎水終萬物始萬物者莫盛乎艮故
水火相逮雷風不相悖山澤通氣然後能變化既成萬
物也

乾坤猶大君主治六子猶六卿分職神則治道也夏
秋沍無雷而必於勾萌時乃見其鼓物之力四時皆
有風而必於和煦時乃見其入物之用火沍不寒暑

並耀而必炎陽盛氣有以堅物之質水與澤非不四時流行而必於成實剝落見靜氣之能收善氣之能沃至於艮山常鎮而必於木落草萎見其養元於貞而止物於所夫惟禪代而不息於用故能交得而各殫其功此又於流行見對待也神之所爲也神者太極也愈見先後天之同符矣

右第六章

乾健也坤順也震動也巽入也坎陷也離麗也艮止也兌說也

乾坤具全德而六子分受其能故六子有行有止而天運健行厯元會運世而不少衰所以爲健之至六

子有動有靜而地道順承終古靜處於天行之內而體不移所以為順之至聖人合撰天地心理無處不流行無時不凝定八卦之德克備於中是以心具全易而近取遠取無非易道

右第七章

乾為馬坤為牛震為龍巽為雞坎為豕離為雉艮為狗兌為羊

其遠取也外觀萬物而擬其形容是通德類情之事也雞鳴天曉是巽上二陽也不鳴於晝而鳴於將旦是二陽伏一陰也長夏時當日浴土中惟陰氣固於內故能受盛陽之制巽以陰從陽故為雞

右第八章

乾爲首坤爲腹震爲足巽爲股坎爲耳離爲目艮爲手
兌爲口

其近取也。內觀百體而殫其神明。是踐形盡性之事也。艮一陽動於上。而內二陰有以止乎陽。不止於內。不能動於外也。人每事皆使手爲陽氣之動。故震陽動於下爲足。而艮陽動於上爲手。

右第九章

乾天也。故稱乎父。坤地也。故稱乎母。震一索而得男。故謂之長男。巽一索而得女。故謂之長女。坎再索而得男。故謂之中男。離再索而得女。故謂之中女。艮三索而得

男故謂之少男。兌三索而得女，故謂之少女。

二老之相索，氣相求也。藉非理之自然，安能強求而得哉？坤索乾為男，乾索坤為女者，靜以待感，其氣厚也。陰氣求陽而生陽，求在陰而氣王在陽也。陽求陰而生陰，求在陽而氣王在陰也。求與無求，動靜相感之理微矣。天地者，六子之父母。萬物之大父母也。父母者，一家之天地也。王者之享帝，以事親者事天地也。孝子之享親，以事天地者事父母也。同一道也。

右第十章

乾為天，為圓，為君，為父，為玉，為金，為寒，為冰，為大赤，為良馬，為老馬，為瘠馬，為駮馬，為木果。

象寒水。後天西北盛陰之氣。乾之不倚於陽而統乎陰也。象大赤。先天正南盛陽之氣。乾之純陽也。離色赤而乾亦赤者。先天同後天之離位。坎亦為赤者。得乾之中而離火對照也。乾為馬。故窮馬之類。良老脊駁。皆不失其為^馬猶君子具剛德。或純氣內守。或老成練達。或骨幹孤清。或英分軼羣。皆不失其為剛也。良馬猶君子才德並優。駁馬則才力過逞矣。然其雄駁猶韓彭之蹶項也。木萌達於資始之時。而果實於致養之後。坤代乾利物。故為木果。

坤為地。為母。為布。為釜。為吝嗇。為均。為子。母牛為大。輿為文。為衆。為柄。其於地也為黑。

爲吝嗇爲均。迹吝而實均。物見其吝。不見其豐也。子
母牛。陰順之完氣也。大輿。厚德之載物也。陽質陰文。
純陰故曰文。坤五在中之文。不但以畫言也。衆者廣。
土衆民之義。亦不但以畫言也。

震爲雷。爲龍。爲玄黃。爲專。爲大塗。爲長子。爲決躁。爲蒼
筤竹。爲萑葦。其於馬也。爲善鳴。爲馵足。爲作足。爲的顙。
其於稼也。爲反生。其究爲健。爲蕃鮮。

震亦爲龍。長子得潛龍初氣也。玄爲淺青色。青主東。
方生氣。黃中色。主土。功天玄地黃。震爲乾之始交。兼
乾之元善。坤之致養。故爲玄黃。決躁言陽之動乎內。
筤者竹筤。蒼筤竹皮青也。竹之青於外。由其生氣在

內也。蒼筤玄黃言用二陰以緼一陽也。震坎俱象馬。一長男一中男得乾健之氣也。馬之鳴為陽。其鳴之善則二陰也。

巽為木為風為長女為繩直為工為白為長為高為進退為不果為臭其於人也為寡髮為廣顙為多白眼為近利市三倍其究為躁卦。

巽德之制能裁酌故為繩直。巽沈潛多巧思為工。卦有言其疵者進退不果是也。凡卦皆有善有疵獨於巽言之者陰始也。陽主氣陰主臭氣流行臭悶鬱也。人多白眼者深沈有智計陰性然也。震究為健從乎陽之氣力言也。巽陰亦究為躁卦此聖人慮陰之盛。

欲其變而從陽也。無非扶陽之義。

坎爲水爲溝瀆爲隱伏爲矯輮爲弓輪其於人也爲加憂爲心病爲耳痛爲血卦爲赤其於馬也爲美脊爲亟心爲下首爲薄蹄爲曳其於輿也爲多眚爲通爲月爲盜其於木也爲堅多心

坎之隱伏在君子爲退藏洗心在小人爲盜賊奸宄猶艮之陽躁則拘陰害則竄也弓彀在內而引滿殺如坎陽在內勁而有爲也轂軸中轉而馳駟四方如坎陽在內運用如環也心屬大陽發於外則舒暢錮於內則鬱滯心虛則自得故逸而日休心實則多憂故勞而日拙坎心亨而此爲心病者有孚則心亨

加憂則心病矣。心當實以理。不當實以意。實以理者。得坎中之正。實以意者。得坎中之險。故言心病。又言。亟心。皆實也。理實而善。則心亨。意實而不善。則曰病。曰亟。日陽中有陰。月陰中有陽。故日屬離。月屬坎。此陰陽互藏其宅之至理。

離爲火。爲日。爲電。爲中女。爲甲冑。爲戈兵。其於人也。爲大腹。爲乾卦。爲鼃。爲蟹。爲羸。爲蚌。爲龜。其於木也。爲科上槁。

鼃。蟹。羸。蚌。龜。俱肉在甲內。甲陽肉陰。五者均陽中陰。惟龜得離之神。以靜能食氣。靈可以卜也。蚌應月盈虧而生珠。真陰之氣。坎水離蚌。水火之相爲用也。

艮爲山爲徑路爲小石爲門闕爲果蓏爲閤寺爲指爲
狗爲衆爲黔喙之屬其於木也爲堅多節

徑路多釋爲陽上亘而不得通蓋大塗爲陽曲徑爲
陰艮一陽止於二陰之上是小路雜出衢道之中象
人之小智小數以乘便利也邵子以石爲少剛艮止
一陽故爲小石震爲專爲蕃鮮草木之始也果蓏草
木之終也艮成終成始故爲果蓏

兌爲澤爲少女爲巫爲口舌爲毀折爲附決其於地也
爲剛國爲妾爲羊

兌善氣爲和說而厲氣爲慘殺口舌能說人而不知
其殺人甚於戈矛也故咸上惡口說之滕毀折言陰

之有力也。附決言陰不能與陽爭力也。扶陽抑陰之義也。妄與陽俱以外柔內剛言。羊內剛故躁觸而妄則外工媚夫之態。內伏乘夫之機矣。八卦者聖人見天下之賢而立也。故推之而義無不通。乾坤諸象從天地推之也。震巽諸象從雷風推之也。坎離艮兌諸象皆從水火山澤推之也。此章八卦之次不循乾一兌二之生序而循三索長幼之序者。緣分以推類也。

右第十一章

易內傳卷之十二

序卦傳

有天地然後萬物生焉盈天地之間者唯萬物故受之以屯屯者盈也屯者物之始生也物生必蒙故受之以蒙蒙者蒙也物之穉也物穉不可不養也故受之以需需者飲食之道也飲食必有訟故受之以訟訟必有衆起故受之以師師者衆也衆必有所比故受之以比比者比者也比必有所畜故受之以小畜物畜然後有禮故受之以履履而泰然後安故受之以泰泰者通也物不可以終通故受之以否物不可以終否故受之以同人與人同者物必歸焉故受之以大有有大者不可以

盈故受之以謙有大而能謙必豫故受之以豫豫必有
隨故受之以隨以喜隨人者必有事故受之以蠱蠱者
事也有事而後可大故受之以臨臨者大也物大然後
可觀故受之以觀可觀而後有所合故受之以噬嗑嗑
者合也物不可以苟合而已故受之以賁賁者飾也致
飾然後亨則盡矣故受之以剝剝者剝也物不可以終
盡剝窮上反下故受之以復復則不妄矣故受之以无妄
有无妄然後可畜故受之以大畜物畜然後可養故受
之以頤頤者養也不養則不可動故受之以大過物不
可以終過故受之以坎坎者陷也陷必有所麗故受之
以離離者麗也

二老陰陽之統萬物之大父母而爲氣化之所從生也。終坎離者先後天乾坤坎離互居南北之位也。物之始生有二義。一者洪濛初闢族類漸聖人未耜杵臼以開粒食之利。一者大亂初平生氣始復聖人重農興教以啟太平之基。飲食有道則非嗜欲也。養生之大本即可以得養性之理。蠢動蜂起豈專爲飲食發難然失所而致亂。究之由飲食之欲耳。前之需後之畜皆厚生之事。但粒食開於屯蒙之始特肇其端而畜行於師比之時乃暢其用也。呂心翼云通極必否此氣數之自然否必協力求濟此人

事之當然二語盡之蓋有當然乃全其自然天人相

成之道也。豫大之世。承平日久。情逸弊。名為治安。實有不測之憂。故不可不奮然振起也。前云有禮而泰者。興文治以開風氣之先。久安長治之大猷也。後云致飾則剝者。憂文勝以持風氣之靡。憂盛危明之深思也。事尚其大。而飾忌其致者。實勝則原本益宏。華勝則真氣漸靡也。養則可大。而才不可過者。德盛則道充。能利物。才浮則氣盈。反擾物也。

右上篇

有天地然後有萬物。有萬物然後有男女。有男女然後有夫婦。有夫婦然後有父子。有父子然後有君臣。有君臣然後有上下。有上下然後禮義有所錯。夫婦之道不

可以不乆也故受之以恒恒者久也物不可以久居其
所故受之以遯遯者退也物不可以終遯故受之以大
壯物不可以終壯故受之以晉晉者進也進必有所傷
故受之以明夷夷者傷也傷於外者必反其家故受之
以家人家道窮必乖故受之以睽睽者乖也乖必有難
故受之以蹇蹇者難也物不可以終難故受之以解解
者緩也緩必有所失故受之以損損而不已必益故受
之以益益而不已必決故受之以夬夬者決也決必有
所遇故受之以姤姤者遇也物相遇而後聚故受之以
萃萃者聚也聚而上者謂之升故受之以升升而不已
必困故受之以困困乎上者必反下故受之以井井道

不可不革故受之以革革物者莫若鼎故受之以鼎主
器者莫若長子故受之以震震者動也物不可以終動
止之故受之以艮艮者止也物不可以終止故受之以
漸漸者進也進必有所歸故受之以歸妹得其所歸者
必大故受之以豐豐者大也窮大者必失其居故受之
以旅旅而無所容故受之以巽巽者入也入而後說之
故受之以兌兌者說也說而後散之故受之以渙渙者
離也物不可以終離故受之以節節而信之故受之以
中孚有其信者必行之故受之以小過有過物者必濟
故受之以既濟物不可窮也故受之以未濟終焉

上篇首乾坤而下篇首咸者乾坤父母之道而咸男

女之交、子承父母之義也。終濟未濟者、水火之交體、
生用之義也。上篇多言治術、君道也。下篇多言學術、
仕進、臣道也。事使之義也。夫婦之道可久、而物之居
其所不可久者、居室人道之當然。百年不易、功名人
事之遽然。與時代謝也。一陰陽對待之正、一陰陽乘
除之正也。壯晉同也。而云不可終壯、言恃壯之不
能遂其進也。朝廷有朋黨聲援、則賢者隱、故必聚而
上、乃謂之升。家道窮必乖、如夏有妹喜、周有褒姒、
及唐之武曌、楊太真、其明鑒也。難初解、宜安靜以
寧民、故利用緩。若業初立、宜奮勵以有為、則忌用緩。
緩則怠弛失理、緩急因乎時、酌乎事也。薰蕕不同

器而藏。君子小人不同國而治。故決決之後。繼以姤
萃。升井。前於晉。繼以明夷。後於升。繼以困。此造化盈
虛消息之理。聖人爲君子遠矣。意革必以鼎。繼此大一
統之義。懼後世有割據方州。盜竊名號之事也。主器
必長子。此重宗社之本。懼後世有顧命不正。嫡庶相
戕之禍也。動非不可而不終。可動止非不可而不可
終止。動與止以偏爲害也。既不可終動。又不可終
止者。本體惡往來之憧擾。故宜止乎其所作用。忌艮
限之悶塞。故宜與時偕行。大由於得所歸。而窮大反
失居者。有本而大。則用以成體。無本好大。則逐用遺
體也。動靜大小。乘乎機。準乎量也。窮大失居。旅無

所容。如大康畋洛十旬。而致有窮之篡。周厲黷貨。監諉而有流彘之禍。宋徽(奉應)花石。窮極玩好。而召北狩之辱。皆擁盛滿之勢。而蕩其心。甚哉盈之可畏也。故大有繼以謙。而豐次以旅。同一戒也。凡人事學術皆然。動而止。止而漸。散而入。入而說。總一通復變化之理。人心離散。信不立也。然渙之後。不次以中孚。而必節。而信之者。蓋離散之故。由於物力詘。而人失其所。故欲敦信以收人心。必自節始。節而信之者。言制度議節。確有可信之理。而人信之也。若有信必行。則失理之當然矣。小過者失中也。按序卦傳。或言天道始終。或言世運興衰。或言君德治術。或言學

術人才要之止氣數之流行變通一歸於易簡之理而已。上篇原本天地生人之由是生生之始也。下篇氣運不窮之數是生生之終而復始蓋惟有以始之故終始如環無端故曰生生之謂易故曰窮則變變則通通則久。玩其轉句或然後可或而後有或必有所或不可以終不可不總見事理微著始終之序變通循環之機。槩云故受之者見理氣之自然非強設也。

右下篇

雜卦傳

乾坤剛柔比樂師憂

臨觀之義或興或求

屯見而

不失其居蒙雜而著

自乾坤累六卦而及師比見三才不易理世變不易
寧也序卦先師次比而雜卦先比次師者見人心聚
散倏忽而憂患每生於逸樂也比與天下同其樂師
與天下同其憂惟樂之故憂之心同而道一也臨
觀二或字妙上之臨下之觀上相求以道相與以性
此二卦以交爲對屯在世運當其經綸創建赫然
天壤而實於性情之無所櫻也蒙在人心當其意識
未定紛錯無主而加以養正之功則本體自全其通
明也均之坎險遇於外則不失居伏於內則雜存乎
其用也以內震制外坎理微矣哉

震起也艮止也損益盛衰之始也 大畜時也无妄災也 萃聚而升不來也謙輕而豫怠也

震陽下起當乾元資始之時艮陽上止爲貞元交會之候動靜相生始終如環以相成爲對也損下爲衰而損極必益亦盛始益下爲盛而益極必損亦衰始盈虛因乎數酌劑在於人以相益爲對也 強暴可鋤則因時起事非敢任威權也修德致咎但反求自責非敢萌怨尤也 萃者人無匿志治運之盛也升者野無留良士氣之昌也惟朝野一心故君子道隆以相因而對也謙自輕尊人恭如其則平施之道也豫時和無事恐其怠荒防危之思也能小心卑謹斯

媮玩不生以相規而對也

噬嗑食也賁无色也

兌見而巽伏也

隨无故也蠱

則飭也

剝爛也復反也

晉晝也明夷誅也

井通

而困相遇也

當噬而噬以有刑致無刑也當止而止本無色為有

色也

兌見感而遂通達道之和也巽伏退藏於密

立本之中也兌以和衆雖陰用事於外而實陽為質

幹非內陽則其說為阿世諧俗巽以持幾雖陰用事

於內而由陽氣流行非外陽則其入為深詭不端

隨道守成非因循也當無事時宜以安靜養太平之

福蠱道起敝非喜事也值多災時宜以振作挽衰靡

之運。爛如火燬物。善類屏斥。被其碎爛。朝廷中外。被其破爛。止存碩果爲餘燼耳。晉世光明。明夷暗晦。明極必至於暗。以相生而相反。傷於恃也。恃之爲害甚矣。井養已德。以養天下。流通由乎內也。困修已而爲異已。詘遭。遭遇係乎時也。但有以通於內。何惜乎鬱於外。

咸速也。恆久也。渙離也。節止也。解緩也。蹇難也。睽外也。家人內也。否泰反其類也。大壯則止。遯則退也。咸者。感物之機。妙於敏。恆者。成物之化。深於漸。人心不固。始自浮靡。而整肅海內。急宜定制。故渙與節對。解大難。初平。宜寬養未固之元氣。如病痊。須溫補。

之劑。蹇世變方殷，宜激勵既餒之人心。如疾劇用瞑眩之藥，睽乖逆見乎外，家人順敬敦於內，觀睽與家人之對，知爭黨成風，弊切門庭，而靖綏遠邇，莫先於閑家。善濟睽者，先治內而後及外，觀否泰之反其類，知陰陽之消長，不專在天道，而旋轉乾坤，必由人事之修。遯退而大壯亦云止者，止非不進之謂，謂以禮自閑而事不輕舉也。大壯止於朝廷，與遯之退於山林反對，蓋道當居其所則居之，當退隱則不居，本義訓止爲不進，是當用而舍，恐非君子乘時之義。大有衆也，同人親也，革去故也，鼎取新也，小過過也，中孚信也，豐多故，親寡旅也，離上而坎下也，小畜寡。

也履不處也

大有一德同風道之廣而大也同人親賢遠奸情之專而正也情之正即是道之大去故者祛積世之害取新者遺奕世以休小過才薄而自用病在少誠中孚敦信而守貞善於補過多故者盛滿氣勢寡親者窮迫情形盛極故趨於窮亦以相生爲反對也離不上炎則水之用不成坎不下潤則火之用不成此以交爲對也小畜一陰單寡能制羣陽者時勢在也履五健決不處能轄六三躁陰而統四陽者道德在也一時勝一道勝不繫衆與寡

需不進也訟不親也大過顛也姤遇也柔遇剛也漸女

歸待男行也。頤養正也。既濟定也。歸妹女之終也。未濟男之窮也。夬決也。剛決柔也。君子道長，小人道憂也。

需治理漸昌。君子不擾，擾於進取。訟風化未洽。小人方婞婞於爭構。弭訟在於安靜。故以需對訟。蔡虛齋更定大過以下反對，而訓之云：大過過中而顛，非正也。頤者養不失正，非顛也。既濟剛柔當位，百度惟貞，時之定也。未濟三陽失位，事莫能成，男之窮也。歸妹既歸夫家，得終身之託，乃女之終也。漸則必待男備六禮而行，乃女歸之始也。姤以一柔遇五剛，小人漸有犯君子之勢也。夬以五剛決一柔，君子道長，浸昌浸明。小人道憂，浸微浸消也。愚按本文語氣，大過

之顛。在中四陽過盛而將衰。姤之遇。在下一陰始起。而方新。二卦相對。爲陰陽消息一大關也。漸待男。則君子之出處定。頤養正。則萬民之禮俗定。故承以既濟。曰定。歸妹女終。而人道之生育以長。未濟男窮。而治道之變通以長。故承以夬。曰道長。此漸頤既濟三卦。與歸妹未濟。夬三卦。以相合而峙對也。始於反對。終於合對。理微矣哉。雜卦始云乾剛坤柔。終以剛決柔者。復其初也。柔盡決。仍純乾矣。言六十四卦之統於乾也。故序卦雜卦俱首乾。其對處或相反。或相濟。或相因。或相生。或相交。而道歸於一也。總之聖人見得易理無非兩。兩無非一。對待交易無非大極之

流行也。序卦終未濟者，理亂循環而不窮，自然之數也。雜卦終夬者，邪以貞勝而有定，當然之理也。明理亂之無定，使人知維治而不敢徂，明正之必勝邪，使人知守正而不少怯，能全當然之理，自可制造然之數。數固統於理也。序卦是流行之易，雜卦是對待之易。張汝霖云：聖人神明易理，順者翻者都是道，大約不出於因此造化生剋之理也。

易傳外篇

大易略論

聖人之道備於六經。六經之義賅於易。嘗試得而論之。兩儀摩盪。極對待流行之用。此生生之理所權輿也。二老六子。見君臣父子尊卑長幼之大分。此人倫之道所網維也。六爻對待。各有定從。不亂其位。剛柔互劑。不偏於一。此羣分類聚之正。交濟對治之理。治道所由明也。卦例以五爲君。通於六十四卦之同。爲天下之通義。每卦各有成卦之主。徇於本卦之歸。爲一卦之通義。此全以統偏。偏以見全之微理也。君道剛。而六也。亦尚柔。臣道柔。而九二九四亦用剛。或以當位善。或以不當位亦

善或以正應善或以近與同德相應亦善何其變化而
不執一也八卦廣其象不一而足如乾龍馬之類約其
德一而盡如乾健之類何其雜而止於所也當其盛則
慮衰值其衰則思盛或吉而吝或悔而終吉何其深於
戒而銳於勸也所惡於首惡或引之就正如否之初小
畜之四所善之良臣或抑之使懼如豫萃之四同人之
二所尊之王明或儆之使惕如履之九五師之六五所
病之庸主或導之維新如豐之六五夬之九五何其予
奪進退無適莫也乾主健而天德不為首賁主文而白
賁賤為吉艮主止而病九四之強止咸主感而刺諸
爻之遂感巽沈入而利武人之貞兌和說而三以來兌

以又何其專而能兼純而能備也陰陽之義至矣哉

乾

乾健也健者天之行能用九斯至健健而不亢者天之則元亨利貞皆健也總一則也聖人法天之健是爲御天之龍奉天之則是爲無首之龍惟不見其首所以能御天而首出夫豈獨飛在天者爲乘龍之聖人哉君子學易體乾無時不有六龍變化之用焉或憂違而遯世或中正而善世或進修而惕或自試而疑孰非乾道之變化龍之隨時蟄伸者乎觀其釋元亨利貞言終始釋利貞兼言變化可見說亨利貞一氣貫通聖人與乾道同一正也正者天則也所以爲健也潛見惕躍飛一健進

退存亡一正。一日有一日之六位。一事有一事之六位。終身有終身之六位。進退存亡者。六位所歷之消息盈虛也。知時乘六龍之道。則知正矣。自強不息。純乎正也。亢悔之失。在用強而盡強之性也。故曰知進退存亡而不失其正者。其惟聖人乎。故曰乾元用九。乃見天則。聖人所以用九者。在乎大明終始而已。終始者。乾道之所以變化。即易道之所以生生也。明其始而後能體仁嘉會。以法天之元亨。明其終而後能貞固利物。以法天之利貞。貞下起元。元統四德。天之終始也。時乘六龍。如環無端。聖人之終始也。蓋惟有健之體。乃有乾之用。是之謂體乾。是之謂用易。

坤

坤地道也、順也、地純乎順、故奉天時行而大終、人臣法地道而純乎順、故無成而安貞、牝馬之貞、順之至也、用六之所以永貞也、坤之順而無疆、猶乾之健而不息也、故曰德合无疆、應地无疆、履霜之戒、惡其不順於始也、于野之戰、惡其不順於終也、夫惟直方含章、括囊黃中之君子、為能養此順德、至於厚德載物、而坤道成矣、故曰坤道其順乎、故曰用六永貞以大終也、

坤陰道用事、不利剛武、而五以才弱處剝撓之運、自度未堪大事、而隱存陽明之天理、惟虛已任賢、以保世圖存、故曰黃裳元吉、其蜀漢東晉南宋之時乎、然昭烈差近、宋高則私心暗昧極矣、象言文在中者、言其心境坦

白光明無私昧也。坤世暗晦，全恃人心之文明，故二言道光三言光大，而五稱文在中，並尚光明。陰中含陽，所謂隱存陽明之天理也。天氣有時而晦，天理不可一日而晦，此聖人扶陽之微旨也。

乾二方與之龍，可以出田而濟物。坤上既懋之龍，豈能野處以全身，方其潤也。野沃爲田，亢燥之後，田不膏而僅爲野矣。于野則虺蟒得地，龍豈能陸爭乎？如天子端居朝廷，命將出師以討不庭，征而無戰。若周天王出居于鄭，唐發馬^逸走奉天，宋失汴京，播越閩廣，爲戰於野矣。龍至於用戰，已非其故。況于野乎？其在人心，天理常主

於內以克制人欲爲於天於淵若放心已久而於嗜欲
紛擾中持平旦幾希之好惡以當斧斤則天理孤危亦
爲戰于野天下事以理為主亦以氣勢爲用乾六龍龍
氣盛坤上之龍龍氣衰乾龍在天在田在淵龍得勢坤于
野龍失勢龍變化之神物可以在天在淵在田而必不
可以在野何也龍以水爲勢天淵田皆水而野陸也龍
可潛可躍可飛而必不可戰何也潛飛則不見其首戰
則露頭角而犯不正也

乾坤

乾極言元之大坤極言貞之利陽尚其始陰尚其終也
乾非元無以要終坤非終無以返始此陰陽終始相生

之道也。乾元大始，坤貞大終。其在聖學，則乾元爲天心，渾全先天之事也；坤貞爲德性堅定，後天之事也。元貞相貫，乾坤一理。朱子所謂仁智交際之間，乃萬物之機軸也。乾貴用九，坤貴用六，能用則健順之德與時偕行，故乾曰時乘，坤曰時行，不能用則剛柔之氣偏滯格礙，而至於亢戰，故乾上曰窮之災，坤上曰其道窮究之陽愆，則亢者失其健之正也，故不能持久。陰逆則疑，疑者失其順之正也，故必至於戰。乾之用九，純乎剛而不失之失之猛也，故以无首稱吉；坤之用六，純乎柔而不失之靡也，故以永貞爲利。乾不獨爲君言也，臣亦有焉；乾乾惕若是已，坤不獨爲臣言也，君亦有焉。黃裳元吉，正位

居體是已。故不明於順之義者，不能行健。不明於健之義者，不能用順。統於一正而已。故乾曰：不失其正。坤曰：正位。然上六之戰，是乾與坤戰也。乾惟有上九之亢，故滿極而損，致有坤上之戰。此陰陽並失其正，治亂興衰之義也。然陽雖敗，猶能陰戰，不失其爲龍。陰雖盛，終屈陰陽之分，難掩其爲黃。蓋乾上之亢，猶是陽之過也。未嘗自悖其質也。坤上之疑，則是陰之反也。大自悖其分也。此又陽順陰逆，陽主陰客之常也。或曰：乾坤九六互變，其義何取？曰：陰之體不逮陽，不得不變而從陽。資陽之用，以成其體。此月之光於日之義也。陽之體大勝夫陰，亦必變而徇陰者，兼陰之用，以善其用。此又日嗣因照。

以月之義也。夫陽大陰小，小誠不能不求夫大，而大亦資夫小者。於此見陽之量廣而無方，陰之志謹而善因也。少不變而老變，何也？老者之氣盛極而衰者也。不變則衰氣爲死氣矣，故變爲生生之道也。老不變，老者何也？氣已盈矣，而復趨於盈，衰矣，而復救以衰，則是老夫老妻，剛柔無相濟之用矣，故變而趨少。則乾坤二老，各有以陰濟陽之理也。老陽而少陽也，此陰陽中之陰陽也。易之道變而不違其常，而於乾坤爲最著。

乾坤亢戰之義廣矣。在天氣有寒暑剝復之亢戰，在國運有上下變革之亢戰，在朝廷有君子小人邪正爭黨之亢戰，在人心有理欲消長之亢戰，在世道有王霸正

閏爭長中外爭強之亢戰惟陰陽各守其常斯不至於
亢而戰惟陽克自盡其道即至不得已而戰而自不失
其正故健順互爲資者陰陽相生之大道也陰陽不相
爭而以陽爲主陰陽相安之大分也